



Irma e viodeve indaûr la sô vite e pensave che forsit no jere nassude sot di une buine stele, ma in chê gnot al doveva jessi scûr e cîl di plomp e difat ducj i siei siums a jerin lâts in fum. E jere restade sole inte cjase grande là che e jere nassude e là che un timp a jerin in tancj a stâ e cumò no si sintive nancje une vôs. La sô int e jere lade cun Diu, no jere stade fortunade in amôr ancje se e jere stade tant inemorade.

E jere nassude tai agns dopo vuere e par fortune no veve vût cussience di ce che al jere stât dut chel maçalizi.

E veve a pene disesiet agns cuant che e veve fat chel incuintri che al sarès stât determinant par jê. Si clamave Leon e al faseve il mestri tun paîs vicin, lu veve incuintrât pe prime volte in sagristie, un biel zovin, tor vincj agns, ben vistût, cui mustacjins neris e i cjavei tirâts di une bande.

Don Milio lu veve clamât a direzi il Coro par sostituî Rico che al jere malât e aromai indenat cui agns. Irma e veve sintût pe prime volte un baticûr sul stomi e un sgrisul mai provât. E sperave di vê la sô atenzion e duncje e cirive di jessi braurine cun lui, ma lui al jere zentîl cun dutis e jê si strussivave par chest. Di gnot no durmive e no veve plui fam, sô mari le cjatave un pôc imbambinide cul cjâf tai nûi e si domandave ce che i succedeve, ma Irma no le scoltave e i diseve che e stave ben plui di simpri e al jere vêr parcè che chel che e

provave par Leon al jere un ben speciâl che no veve mai provât. Jê lu scoltave inmagade e spietave cun ansie la joiibe di sere par lâ a fâ lis provis dal coro e i pareve che al sarès stât masse timp di spietâ par riviodilu.

E sintive la sô vôs di tenôr cuant che al cjantave cun lôr come un agnul e e lave a durmî cul pinsîr di lui che no le lassave mai. E provave ancje un sintiment gnûf che prime no cognosseve , la gjelosie, une brute bestie che e cirive di taponâ, la pôre di no podê viodilu plui o piês che al cjalàs une altre zovine e cussì e jere malade tal cûr di mâl di amôr e di gjelosie, e jere plombade di colp in dôs disgraciis, di sintîsi inmò plui sole e gjelose.

Ma Leon no le viodeve come che jê e desiderave , forsit le considerave masse zovine par impegnâsi, ma jê e varès fat disesiet agns e i siei za a pensavin di prometile a Jacum , il fi dal mulinâr e duncje e doveve liberâsi di chel vencil.

“ La miôr vite e je chê che no vin podût vê”. I veve dit sô mari. In chês peraulis e veve sintût ancje il so marum par une vite di rinunzie, di sacrifici e di tant lavôr come che e jere par solit chê des feminis maridadis. Irma e veve altris progjets e di sigûr no di maridâsi cun Jacum. “ Pluitost mi fâs muine.” E pensave.

Ma il so biel sium di amôr si veve za sfantât cuant che Leon al veve dit a Don Milio che al voleve continuâ i siei studis di musiche e di trasferîsi te citât. Di alore jê no jere plui lade a cjantâ e di Leon no veve plui volût sintî fevelâ, al jere restât dome tal so cûr, e veve scuiert l'amôr ma so redut il mâl di amôr.

di Egle Taverna

Par condividi:

[Facebook](#)

[WhatsApp](#)

[Telegram](#)

[Print](#)

[Email](#)